
CONSEYERÍA D'EDUCACIÓN

Resolución de la Conseyería d'Educación, pola que se convoquen les pruebas de certificación de llingua asturiana del añu 2025 nel Principáu d'Asturies.

RESOLUCIÓN

FUNDAMENTOS DE DERECHU

L'artículu 3.3. de la Constitución Española determina que la riqueza de les distintes modalidaes llingüístiques d'España ye un patrimoniu cultural que va ser oxetu d'especial respetu y protección.

La Carta Europea de Llingües Minoritaries y Rexonales de 5 de payares de 1992, ratificada por España'l 2 de febreru del 2001, espón nel artículu 7.1. apartáu f) que los Estaos signatarios han basar la so política, la so llexislación y la so práctica en materia de llingües rexonales o minoritaries, ente otros oxetivos, en "la provisión de formes y medios afayadizos pa la enseñanza y l'estudiu de les llingües rexonales o minoritaries en tolos niveles".

En desenvolvimientu del artículu 4 del Estatutu d'Autonomía del Principáu d'Asturies dictóse la Llei del Principáu d'Asturies 1/1998, de 23 de marzu, d'Usu y Promoción del Bable/Asturianu, onde, ente otros cuestiones, trátense los aspectos relacionaos cola enseñanza, estableciendo que'l Principáu d'Asturies ha asegurar la enseñanza del bable/asturianu y ha promover el so usu dientro del sistema educativu. Amás, nel so artículu 11 referíu a titulaciones, dispónse que'l Principáu d'Asturies ha establecer: a) Les titulaciones necesaries pa impartir la enseñanza del bable/asturianu; b) Titulaciones y certificaciones qu'acréiten la conocencia del bable/asturianu.

Per otru llau, el Conseyu d'Europa nel Marcu Común Européu de Referencia pa les Llingües establez directrices tanto pal deprendimientu de llingües como pa la valoración de la competencia de falantes nes diferentes llingües. Estes pautes han ser un referente clave nel establecimientu de los diferentes niveles de competencia de la llingua asturiana.

Pa llevar a cabu'l cumplimientu d'estes directrices, desenvuélvese'l Decretu 47/2019, de 21 de xunu, pol que s'establecen los niveles de competencia nel usu de la llingua asturiana y regúlase la prueba de certificación correspondiente a esos niveles adaptaos al Marcu Común Européu de Referencia de les Llingües, que va ufiertar la posibilidá d'adquirir, acordies coles sos necesidaes y a lo llargo de la vida, diversos niveles de competencia en llingua asturiana. Esti Decretu determina tamién que va ser responsabilidá de la Conseyería competente en materia de política llingüística la organización y xestión d'esta prueba de certificación.

La Resolución del 28 de xineru del 2020, de la Conseyería de Cultura, Política Llingüística y Turismu, determina que l'establecimientu de les llinies prioritaries en materia de política llingüística, amás de la coordinación d'actuaciones en materia de titulaciones y certificaciones en llingua asturiana, ye competencia de la Conseyería de Cultura, Política Llingüística y Turismu, anque razones d'eficacia y de rigor na xestión de los recursos públicos aconsen que la convocatoria, elaboración, alministración, evaluación y calificación de les pruebas pal llogru de los certificaos de los niveles de la llingua asturiana y la espedición d'esos certificaos y les sos equivalencies les faiga la Dirección Xeneral d'Ordenación, Evaluación y Equidá Educativa de la Conseyería d'Educación, en beneficiu d'una mayor eficiencia del gastu públicu. Con esta resolución deléguese competencies d'una conseyería a otra pa organizar y xestionar la prueba.

L'artículu 1.3 del Decretu 47/2019, de 21 de xunu, establez los niveles competenciales Básicu A1, Básicu A2, Intermediu B1, Intermediu B2 y Avanzáu C1, y el so artículu 3 determina que caún de los niveles tienen qu'integrar estes cinco actividaes de llingua:

comprensión de textos orales, comprensión de textos escritos, producción y coproducción de textos orales, producción y coproducción de textos escritos y mediación, y va garrar como referencia los oxetivos, les competencies, los conteníos y los criterios d'evaluación establecíos pa los distintos niveles del Decretu mentáu.

Esti mesmu Decretu nel so artículu 4.1. establez que pal llogru del certificáu de los niveles de la llingua asturiana va ser menester superar una prueba de certificación. Amás, l'artículu 13 estipula que s'han convocar les pruebas específiques de certificación, polo menos, una vez al añu pa un mínimu d'un de los niveles.

Nel añu 2025, y nesta resolución de convocatoria, ufiértase la posibilidá de certificación nel nivel Básicu A2, nel nivel Intermediu B2 y nel nivel Avanzáu C1.

De resultes de lo anterior, pa la organización de les pruebas de certificación de llingua asturiana nel añu 2025 ha tase a lo dispuesto nel mentáu Decretu 47/2019, de 21 de xunu, y nos apartaos d'esta resolución de convocatoria.

Por todo esto, vistos l'artículu 38 de la Llei 6/1984, de 5 xunetu, del Presidente y del Conseyu de Gobiernu del Principáu d'Asturies, el Decretu 70/2023, de 11 d'agostu, modificáu pol Decretu 80/2024, de 30 d'avientu, pol que s'establez la estructura orgánica básica de la Conseyería d'Educación, la Resolución de 5 de setiembre del 2023, de la Conseyería d'Educación, pola que se deleguen competencies en dellos órganos de la Conseyería d'Educación, amás del artículu 14 de la Llei del Principáu d'Asturies 2/1995, de 13 de marzu, sobre Réxime Xurídicu de l'Alministración del Principáu d'Asturies,

RESUELVO

Primero.- Aprobación de la convocatoria

Aprobar la convocatoria de les pruebas de certificación de llingua asturiana de los niveles de competencia Básicu A2, Intermediu B2 y Avanzáu C1 del añu 2025, nel Principáu d'Asturies.

Segundo.- Oxetu

L'oxetu d'esta resolución ye convocar les pruebas de certificación de llingua asturiana del añu 2025, nel Principáu d'Asturies, d'alcuerdu colo afitao nel Decretu 47/2019, de 21 de xunu, pol que s'establecen los niveles de competencia nel usu de la llingua asturiana y se regula la prueba de certificación correspondiente a esos niveles adaptaos al Marcu Común Européu de Referencia de les Llingües.

Tercero.- Finalidá y efectos de les pruebas

La finalidá de les pruebas de certificación de llingua asturiana ye evaluar y acreitar la competencia llingüística de les persones aspirantes que permita, nel so casu, la certificación de competencies nel usu de la llingua asturiana nos niveles de competencia Básicu A2, Intermediu B2 o Avanzáu C1.

Cuarto.- Convocatoria

1. El Decretu 47/2019, de 21 de xunu, establez que les pruebas de certificación de niveles de llingua asturiana han entamase polo menos una vez al añu pa un mínimu d'un de los niveles.

2. Nel 2025 va celebrase una única convocatoria de les pruebas de certificación de llingua asturiana de los niveles de competencia Básicu A2, Intermediu B2 y Avanzáu C1, nes feches que figuren nos calendarios que s'inxerten n'apartáu decimoquintu, y con un ámbitu d'aplicación que va ser la comunidá autónoma del Principáu d'Asturies.

Quinto.- Requisitos y persones destinataries

1. Van poder presentase a la prueba de certificación de llingua asturiana de los niveles de competencia Básicu A2, Intermediu B2 o Avanzáu C1 quien tengan polo menos dieciséis años o los faigan nel añu 2025.

2. El personal docente o aquellos persones que participaren na organización, la elaboración, l'alministración y la evaluación de les pruebas, en cualquiera de los sos estadios, nun van poder inscribise nes pruebas de certificación.

Sesto.- Inscripción

1. Les solicitúes d'inscripción nes pruebas de certificación de llingua asturiana han presentase nos plazos afitaos nel calendariu establecíu n'apartáu decimoquintu y han adaptase al modelu normalizáu disponible na sede electrónica de l'Alministración del Principáu d'Asturies (<https://sede.asturias.es>), que va poder llograse introduciendo'l códigu de ficha de serviciu CERT0055T01 nel buscador de la cabecera (asitiáu na parte cimera derecha), acompañáu de la documentación que s'indica n'apartáu séptimu d'esta resolución.

2. La solicitú d'inscripción nes pruebas de certificación de llingua asturiana del añu 2025 ha presentase nos centros d'inscripción que se detallen n'apartáu decimosestu d'esta resolución, ensin perxuiciu de lo establecíu n'artículu 16.4 de la Llei 39/2015, de 1 d'ochobre, del Procedimientu Alministrativu Común de les Alministraciones Públiques.

3. Ha presentase una única solicitú por persona, y nel so casu, la solicitú d'adaptación de les pruebas. Namás va poder optase por ún de los dos niveles de competencia ufiertaos. La presentación de más d'una solicitú por persona o'l conseñamientu de más d'un nivel na solicitú van implicar la esclusión nel procesu d'inscripción.

4. Les persones aspirantes con dalguna discapacidá y/o necesidaes específiques d'apoyu educativu (NEAE) que precisen dalguna clas d'adaptación posible de tiempu y/o medios pa la realización de les pruebas, han formular el pidimientu correspondiente nos recuadros habilitaos nel formulariu de solicitú y axuntar la documentación que s'indica n'apartáu séptimu d'esta resolución.

Séptimu.- Documentación

1. A la solicitú d'inscripción han acompañase estos documentos:

a) Fotocopia del Documentu Nacional d'Identidá, pasaporte o cualquier otu documentu llegalmente reconocíu, en vigor, qu'acreíte abondo la identidá y la edá de la persona aspirante. Acordies col artículu 28.2 de la Llei 39/2015, de 1 d'ochobre, del Procedimientu Alministrativu Común de les Alministraciones Públiques, va presumise que la consulta o llogru d'aquella documentación qu'elaborare cualquier Alministración ta autorizao poles persones interesaes nun siendo que conste nel procedimientu la so oposición espresa.

b) Xustificante del abonu del preciu públicu, **31,63 euros**, que primero ha ingresase en metálico en cualquiera de les entidaes bancaries collaboradores del Principáu d'Asturies pente medies d'orixinal del impresu normalizáu 046, que va poder llograse dende la Oficina Virtual de los Servicios Tributarios <https://www.tributasenasturias.es> (Entidaes financieras collaboradores: BBVA, Banco Santander, Banco Sabadell, Unicaja Banco, Caja Rural de Asturias, La Caixa). El pagu de la tasa d'inscripción tamién va poder realizase per Internet en <https://www.tributasenasturias.es>, en rellenando online'l documentu 046, executando les instrucciones que señala la páxina web pa facer el pagu. El modelu 046 rellenáu convenientemente, y desque pagada la inscripción, val como resguardu del pagu realizáu, nun siendo nel pagu per Internet, que nesi casu'l xustificante de pagu telemáticu tien que se presentar col modelu 046, anque en nengún casu va poder suponer la sustitución del trámite de presentación, en tiempu y forma, de la solicitú d'inscripción mentada.

c) Pa los efectos de bonificaciones y exenciones pola condición de familia numerosa, va aplicase al preciu públicu lo establecíu na Llei 40/2003, de 18 de payares, de Protección a les Families Numberoses.

d) Les víctimes d'actos terroristes, los sos esposos o esposes y fíos o fíes, van tar quitos del pagu del preciu públicu d'alcuertu cola Llei 32/1999, de 8 d'ochobre, de Solidaridá coles víctimes del terrorismu. La condición de víctima ha acreitase cola resolución alministrativa correspondiente. Nel casu de esposu o esposa y fíos o fíes, ha axuntase fotocopia del llibru de familia.

e) Les persones aspirantes que presenten una discapacidá reconocida igual o superior al 33 % nun van tener obligación de pagar el preciu públicu establecíu por Decretu 192/2019, de 24 d'ochobre, pol que s'establez el preciu públicu pola inscripción nes pruebes de certificación de los niveles de competencia nel usu de la llingua asturiana.

f) Les persones con dalguna discapacidá que soliciten dalgún tipu d'adaptación posible de tiempu y/o medios pa la realización de la prueba, han xustificalo. Pa eso han axuntar a la so solicitú'l certificáu acreitativu del tipu y del grau de discapacidá emitíu pola autoridá competente amás del pidimientu concretu de l'adaptación solicitada nel documentu preparáu pal efectú.

g) Les persones aspirantes con Necesidaes Específiques d'Apoyu Educativu (NEAE) que precisen dalgún tipu d'adaptación posible de tiempu y/o medios pa la realización de les pruebes, han formular el pidimientu correspondiente nel recuadru habilitáu nel formulariu de solicitú, axuntando a la so solicitú l'informe médicu qu'acreíte'l so diagnósticu clínicu, emitíu por un Serviciu públicu de salú, y/o informe d'evaluación sicopedagóxica emitíu pol Departamentu d'Orientación del centru educativu onde cursare estudios o d'un Serviciu especializáu d'orientación.

2. Les secretaríes de los centros d'inscripción van facilitar a les persones interesaes en realizar les pruebes de certificación de llingua asturiana la información y la orientación necesaries, van comprobar que la so solicitú d'inscripción tea rellenada correctamente y que s'axunten los documentos que se precisen en cada casu.

Octavo.- Estructura de les pruebes de certificación

1. Les pruebes de certificación de llingua asturiana van midir el grau de dominiu del candidatu o de la candidata nel usu de la llingua asturiana y van ser evaluaes garrando como referencia los oxetivos, les competencies, los conteníos y los criterios d'evaluación establecíos pa cada nivel nel Decretu 47/2019, de 21 de xunu.

2. Les pruebes de certificación de llingua asturiana van constar de cinco partes independientes rellacionaes coles actividaes de llingua de:

- a) comprensión de testos escritos;
- b) comprensión de testos orales;
- c) producción y coproducción de testos escritos;
- d) producción y coproducción de testos orales;
- e) mediación.

3. Los candidatos y les candidates van poder realizar toles partes de que consta la prueba de certificación de llingua asturiana ensin que seya menester la realización o superación previa de dalguna d'elles.

4. La Dirección Xeneral competente en materia d'Ordenación Académica va publicar nel portal educativu Educastur (<https://www.educastur.es/>) un documentu d'especificaciones de la prueba de certificación de llingua asturiana con orientaciones pa la so realización.

Noveno.- Realización de les pruebes de certificación de llingua asturiana.

1. Les persones aspirantes han dir provistes del Documentu Nacional d'Identidá (DNI), pasaporte o cualquier otru documentu llegalmente reconocíu en vigor qu'acreíte abondo la so identidá y edá.

2. Los exercicios de les cinco partes que componen la prueba de certificación de llingua

asturiana van realizase en dos bloques. Nel bloque 1 van facese los exercicios correspondientes a les partes de comprensión de textos escritos, de comprensión de textos orales y de producción y coproducción de textos escritos; y nel bloque 2 van realizase los exercicios correspondientes a la parte de producción y coproducción de textos orales y a la parte de mediación.

3. Los exercicios correspondientes al bloque 1 van realizase nel día y horariu que s'especifica n'apartáu decimoquintu d'esta resolución. Les sedes de realización tanto del bloque 1 como del bloque 2 va designales la Dirección Xeneral competente en materia d'Ordenación Académica polo menos dos selmanes primero de facese la prueba y van publicase nel portal educativu Educastur (<https://www.educastur.es/>).

4. El bloque 2 va desenvolvese en dellos díes. Polo menos 24 hores primero d'empezar esta parte de la prueba, la comisión evaluadora va dar a conocer a les persones aspirantes el tramu horariu y el sitiu onde se van realizar los exercicios pa cada día. Esta información va tar disponible tamién nel portal educativu Educastur. Esta publicación va realizase d'aluerdu cola Llei Orgánica 3/2018, de 5 d'avientu, de Protección de Datos Personales y garantía de los derechos dixitales. Cada aspirante ha comprobar na publicación el sitiu, día y el tramu horariu nel que lu convoquen pa la realización d'esta parte de la prueba. Nun se contempla la posibilidá de cambeos de fecha pa la realización d'esta parte de la prueba, sacante namás nel casu d'hospitalización por causa d'embaranzu y/o partu, teniendo que s'acreditar énte la comisión evaluadora.

Décimo.- Alministración, evaluación y calificación de les pruebas de certificación de llingua asturiana

1. Van nomase les comisiones evaluadores que seyan menester pa la xestión, alministración, evaluación y calificación de la prueba de certificación de llingua asturiana.

2. El director o la directora del centru de realización va poner a disposición de les comisiones evaluadores los expedientes d'inscripción de quien vaigan realizar les pruebas de certificación de llingua asturiana, amás de les llistes y cualquier otru material que seya menester pal desenvolvimientu correctu de les pruebas.

3. Caúna de les cinco partes de que consta la prueba de certificación de llingua asturiana va valorase usando una escala de 0 a 10 puntos, con un decimal.

4. La calificación final de les pruebas de certificación de llingua asturiana va espresase nos términos de "Aptu", "Non aptu" y "Non presentáu", otorgándose la calificación de "Aptu" a quien sacaren polo menos un 6 nel promediu de calificaciones de les 5 partes de la prueba, calculáu esti con redondéu a la décima, y siempre que se verifique la condición de cuntar con una puntuación de 5 o más puntos en caúna de les partes. La calificación final de "Non presentáu" va corresponder a les persones que nun realicen nenguna de les partes de la prueba.

5. De les sesiones d'evaluación y calificación desenvueltas va llevantase acta. L'acta de calificación ha cubrise según el modelu de l'aplicación corporativa SAUCE, qu'ha reflexar la puntuación y calificación sacada poles persones aspirantes en cada parte de la prueba de certificación de llingua asturiana y la so calificación final. L'acta de la sesión d'evaluación y l'acta de calificación han tar firmaes por toles persones integrantes de la comisión evaluadora.

6. Les calificaciones algamaes nes pruebas de certificación de llingua asturiana van grabase al traviés de l'aplicación corporativa SAUCE y d'aluerdu colos procedimientos pal so usu.

7. Una copia de caúna de les actes de calificación ha publicala'l centru de realización onde se realizare la prueba de certificación de llingua asturiana d'aluerdu cola normativa vixente sobre protección de datos.

Decimoprimer.- Publicación de resultaos y reclamación contra les calificaciones

1. Los resultaos de les pruebas van facese públicos d'alcuerdu colo qu'establez la llexislación vixente en materia de protección de datos de calter personal y, en cualquier casu, colo estableció na disposición adicional ventésima tercera de la Llei Orgánica 2/2006, de 3 de mayu, d'Educación.

2. Les persones aspirantes, o los sos representantes llegalos, van tener derechu a conocer les sos calificaciones parciales nes distintes actividaes de llingua, amás d'acceder a los sos exámenes y, nel supuestu de que depués de les aclaraciones correspondientes de la comisión evaluadora exista desalcuerdu cola calificación final otorgada, a presentar reclamación na secretaría del centru onde se fixo la prueba. Esa reclamación va poder presentase nel plazu de trés díes hábiles cuentaos a partir de la fecha de publicación de les calificaciones.

3. Les reclamaciones han dirixise a la persona que presida la comisión evaluadora, que, depués del informe d'esa comisión y nel plazu máximu de dos díes hábiles, va resolver, modificando o ratificando la calificación.

4. La resolución de reclamación ha ser motivada, d'alcuerdu colos criterios d'evaluación y calificación que s'establecieron pa caún de los exercicios de la prueba de certificación de llingua asturiana, y va facese constar si ratifica o modifica la calificación otorgada.

5. La presidencia de la comisión evaluadora va resolver la reclamación presentada, per escrito y nel plazu máximu de dos díes hábiles, cuentaos a partir del otru día de celebrase la sesión extraordinaria d'evaluación.

6. Contra la resolución de la reclamación va poder interponese recursu d'alzada énte la persona titular de la Consejería competente en materia d'educación, nel plazu d'un mes a partir del otru día de facese la notificación de la resolución de la reclamación. Amás, nos 10 díes posteriores a esa notificación, la persona reclamante va tener accesu a les pruebas sobre les que se formuló la reclamación. La resolución del recursu d'alzada va poner fin a la vía alministrativa.

7. Nel casu de que dalguna persona interesada interponga recursu d'alzada, la persona titular de la dirección del centru onde realizó la prueba de certificación de llingua asturiana va unviar a la Secretaría Xeneral Técnica de la Consejería competente en materia d'educación l'espediente de reclamación, integráu por estos documentos:

- a) exercicios realizaos pol candidatu o la candidata y documentos d'evaluación de les destreces orales;
- b) solicitú de reclamación;
- c) recibí de la persona reclamante o acuse de recibu de la comunicación de la resolución de la reclamación;
- d) resolución motivada;
- e) copia de les actes d'evaluación y de calificación de la prueba.

Decimosegundo.- Certificáu d'actividaes de llingua

1. D'alcuerdu colo estableció n'artículu 4.3 del Decretu 47/2019 de 21 de xunu, a quien nun superen na prueba de llingua asturiana les cinco actividaes de llingua del nivel correspondiente, va poder espedise, depués de pidimientu pela so parte, una certificación académica onde se faiga constar que la persona aspirante algamó'l grau de dominiu riquíu en delles de les actividaes de llingua realizaes. Les calificaciones d'actividades de llingua superaes de quien nun llogre la calificación final de "Aptu" nun van tener validez en convocatories posteriores d'esta mesma prueba.

2. Nes certificaciones de les actividaes de llingua, que les ha emitir el secretariu o la secretaria de la sede de realización de la prueba según el modelu de l'aplicación corporativa SAUCE, col preste de la presidencia de la comisión evaluadora, va facese constar la puntuación sacada na actividá de llingua correspondiente.

Decimotercero.- Certificáu de superación

Quien superaren la prueba van poder solicitar na secretaría del centru de realización la expedición d'un certificáu acreitativu de superación, que va emitise al traviés de l'aplicación corporativa SAUCE.

Decimocuarto. - Custodia y archivu de documentos

1. El secretariu o la secretaria del centru de realización en que se desenvuelve la prueba va custodiar les llistes provisionales y definitives de les persones almitíes y escluyíes a la prueba. Tamién va caltener indefinidamente les actes de les sesiones d'evaluación y de calificación.

2. Amás va caltener una copia de caúna de les solicitúes d'inscripción, los exercicios realizaos poles persones aspirantes y demás documentos relacionaos cola celebración de la prueba nos trés meses siguientes cuentaos de magar acabe'l plazu de reclamación, quitando los que correspuendan a quien presentaren una reclamación, que se van custodiar de forma indefinida.

Decimoquinto.- Calendariu, sedes y horarios

a) Calendariu

Fecha/plazu	Actuación
Del 28 d' abril al 15 de mayu (dambos incluyíos)	Plazu d'inscripción nes pruebas de certificación.
27 de mayu	Publicación n'Educastur y nos centros d'inscripción de la llista provisional de persones almitíes y escluyíes.
28, 29 y 30 de mayu	Plazu d'alegaciones contra la llista provisional de persones almitíes y escluyíes.
11 de xunu	Publicación n'Educastur y nos centros d'inscripción de la llista definitiva de persones almitíes y escluyíes.
27 de setiembre (sábadu, horariu de mañana)	Realización de les pruebas. Bloque 1; exercicios correspondientes a: Producción y coproducción de testos escritos. Comprensión de testos orales. Comprensión de testos escritos
Dende'l 6 d'ochobre (horariu de tarde)	Realización de les pruebas Bloque 2; realización, acordies col calendariu y horariu espublizáu de los exercicios correspondientes a les partes de: Producción y coproducción de testos orales Mediación.

b) Sedes y horariu de celebración de les pruebas

Bloque 1. Exercicios correspondientes a les partes de Producción y coproducción de testos escritos, Comprensión de testos orales y Comprensión de testos escritos: sede, horariu y duración.

Sede: Escuela Oficial d'Idiomes d'Uviéu. Avda. Julián Clavería, e/n 33006 Uviéu. L'asignación d'aules va publicase n'Educastur y va comunicase per SMS con antelación abondo.

Bloque 1: 27 de setiembre (sábadu), sesión de mañana	Actividá	Nivel Básicu A2	Nivel Intermediu B2	Nivel Avanzáu C1
	Llamamientu d'aspirantes. Repartu de cuadernos y instrucciones.	09:20 a 10:00 (40 min)	08:50 a 09:30 (40 min)	08:40 a 09:20 (40 min)
	Producción y coproducción de testos escritos.	10:00 a 11:00 (60 min)	09:30 a 11:00 (90 min)	09:20 a 11:00 (100 min)
	Posa.	15 min	15 min	15 min
	Llamamientu d'aspirantes. Repartu de cuadernos y instrucciones.	11:15 a 11:30 (15 min)	11:15 a 11:30 (15 min)	11:15 a 11:30 (15 min)
	Comprensión de testos orales.	11:30 a 12:05 (35 min)	11:30 a 12:15 (45 min)	11:30 a 12:15 (45 min)
	Posa.	15 min	15 min	15 min
	Llamamientu d'aspirantes. Repartu de cuadernos y instrucciones.	12:20 a 12:35 (15 min)	12:30 a 12:45 (15 min)	12:30 a 12:45 (15 min)
	Comprensión de testos escritos.	12:35 a 13:25 (50 min)	12:45 a 13:40 (55 min)	12:45 a 13:50 (65 min)

Bloque 2. Exercicios correspondientes a la parte de producción y coproducción de testos orales y de mediación.

Sede: IES "Alfonso II". C/Santa Susana e/n. Uviéu. L'asignación d'aules y horarios va publicase al traviés d'una consulta con DNI y NIE en www.educatur.es con antelación abondo.

Bloque 2: Dende'l 6 d'ochobre, sesión de tarde	Convocatoria
	La convocatoria pa la realización de los exercicios de les partes de producción y coproducción de testos orales y de mediación va publicase nel centru de realización correspondiente polo menos un día enantes d'empezar esta parte de la prueba. La convocatoria va incluyir la llista de persones convocaes d'aluerdu cola Llei Orgánica 3/2018, de 5 d'avientu, de Protección de Datos Personales y garantía de los derechos dixitales pa cada sesión, el sitiu y la franxa horaria en que les van convocar, amás de cualquier otra información que se considere oportuna.

Decimosesto.- Centros d'inscripción

Llista de centros d'inscripción de solicitúes nes pruebes de certificación de llingua asturiana del año 2025.

IES ARAMO www.iesaramo.es	C/ Antonio Suárez Gutiérrez, 5 Uviéu – CP 33005 985 23 14 10
IES CALDERÓN DE LA BARCA https://alojaweb.educastur.es/web/ies/calderon	C/ Calderón de la Barca, e/n Xixón – CP 33204 985 37 05 40
IES CARREÑO MIRANDA www.iescarrenomiranda.es	Avda. Cervantes, 26 Avilés - CP 33402 985 54 39 11
IES BERNALDO DE QUIRÓS www.ibq.es	C/ Frai Paulino Álvarez, e/n Mieres del Camín - CP 33600 985 46 49 82

Contra esta resolución, que remata la vía alministrativa, pue interponese recursu contencioso-alministrativu énte la Sala de lo Contencioso-Alministrativo del Tribunal Superior de Xusticia d'Asturies, nel plazu de dos meses cuentaos dende l'otru día de notificase, ensin perxuiciu de la posibilidá d'interposición previa del recursu potestativu de reposición énte'l mesmu órganu que dictó l'actu nel plazu d'un mes, cuntáu dende l'otru día de la so notificación ensin que puedan simultaniase dambos recursos, d'alcuerdu colo estableció n'artículu 28 de la Llei del Principáu d'Asturies 2/1995, de 13 de marzu, sobre'l réxime xurídicu de l'Alministración, y nos artículos 123 y 124 de la Llei 39/2015, de 1 d'ochobre, del Procedimientu Alministrativu Común de les Alministraciones Públiques, ensin perxuiciu de que l'interesáu/los interesaos puedan exercitar cualquier otu que-yos paeza oportunu.

Principáu d'Asturies, a 5 de marzu del 2025.

DAVID ARTIME GARCÍA. El Director Xeneral d'Inclusión Educativa y Ordenación (P.D. Resolución de 5 de setiembre de 2023. BOPA n^u 177 de 14-IX-2023).